

***Sulinermik Inuussutissarsiuteqartut Kattuffiata (SIK-p) malittarisassai***

**Kattuffiup aqqa najugaqarfialu**

**§ 1.**

Kattuffiup aqqa tassaavoq Sulinermik Inuussutissarsiuteqartut Kattuffiat (SIK), Kalaallit Nunaanni sulinermik inuussutissarsiuteqartut kattuffigisaat.

*Imm.* 2. SIK-p allattoqarfia Nuummi najugaqarfeqarpoq.

**Siunertat**

**§ 2.**

SIK imaattunik siunertaqarpoq:

- Akissarsiaqarnikkut atorfeqarnikkullu atugassarititaasunik kiisalu sullivinni avatangiisinik toqqissisimanartunik angusaqarnissaq sulisitsisunik isumaqatigiissuteqartarnerit aqqu- galugit.
- Ilinniarnissamut suliffeqarnissamullu periarfissanik pitsaasunik angusaqarnissaq sulisitsis- unik isumaqatigiissuteqartarnerit aqqu- galugit.
- Suliffinni oqartussaaqataanermik angusaqarnissaq sulisitsisunik isumaqatigiissuteqartarne- rit aqqu- galugit.
- Soraarnerussutisiaqalersarnermik aqqissuussinikkut utoqqaliner- mi inuuniarnikkut atuga- risanik pitsanngorsaanissaq.
- Inatsisiliortarnermut sunniuteqarniarnissaq, pingaartumik suliffeqarneq, isumaginninneq, peqqinnissaq, sullivinni avatangiisit soraarnerussutisiaqarnerlu pillugit, taamaalilluni inui- aqatigiinni toqqissisimanarnerulerlunilu aningaasaqarnikkut naligiinnerulertoqarniassam- mat assigiinngisitsisoqannginniassammallu suaassuseq, kinguaassiuutitigut inooqatigiin- neq, amqip qalipaataa, utoqqaassuseq, innarluuteqarneq, upperisaq imaluunniit politik- kikkut sumik attaveqarneq apeqqutaatinnagit. Aammattaaq sulinermik inuussutissarsiuteqar- tut napparsimanerminni, naartunerminni, meerartaarnerminni aamma qitornarsiartaarner- minni kiisalu sulillutik ajutoorsimanermik atornerluisuunermilluunniit kingunerisaannik katsorsarneqarnerminni isertitamikkut sapinngisamik annaasaqannginnissaat inatsisilior- ner- mut sunniuteqarniarnikkut suleqataaffigineqassaaq.
- Sulinermik inuussutissarsiuteqartut sulisinnaanngitsut suliffissaarussimasullu assigiinngit- sutigut, tarnikkut timikkullu, nukittorsarneqartuarnissaat.
- Sulinermik inuussutissarsiuteqartut suliner- minni inuunerminnilu atugarisaannik inuiaqati- giit paasisaqartinneqartarnissaat.

- Suliassaalersuni ataasiakkaani ilaasortat sulisutut soqutigisamikkut tapersersortariaqarfiisigut siunnersortariaqarfiisigullu sullinneqarnissaat.
- Sulisut sinniisaasa suliffinnilu attuumassuteqartut allat qaammarsaavigineqartuarnermik-kut sulinermik inuussutissarsiuteqartut soqutigisaannik suliniuteqarnerminni nukittorsar-neqarnissaat.
- Nunani tamalaani sulinermik inuussutissarsiuteqartut kattuffiinik allanik suleqateqarnissaq SIK-p nunanilu allani kattuffiit taakkua attaveqatigiinnerat nukittorsarumallugu, nunani taakkunani sulinermik inuussutissarsiuteqartunut tamanut iluaqutissamik.

### **Ilaasortat**

#### **§ 3.**

Kinaluunniit SIK-p siunertaanut § 2-mi taagorneqartunut tapersersuisoq ilaasortanngorsinnaavoq, tamatuma ataani

- sulinermik inuussutissarsiuteqartut suliffillit suliffissaaleqisullu,
- lærlingit, ilinniartut praktikkertullu
- ilinniagaqartut, kiisalu
- soraarnerussutisiallit.

*Imm. 2.* Ilaasortat suliffinni kattuffiup pissusissamisoortumik isumaqatigiissuteqarfiginngisaani atorfeqartut sinnerlugit SIK sulisitsisunik isumaqatiginninniarsinnaanngilaq, aammalu ilaasortat taakku sinnerlugit suliffinnut attuumassuteqartut aalajangersimasut pillugit sulisitsisunik isumaqatiginninniarsinnaanani. Taamaattorli SIK sulisoqarnermi inatsisilerinerup tungaatigut siunnersuisinnaavoq suliffinnut attuumassuteqartut aalajangersimasut pineqartillugit.

*Imm. 3.* Ilaasortat soraarninngorsimasut SIK-mit ikiorneqarsinnaapput pisinnaatitaaffitik pillugit oqartussaasunut saaffiginninneranni, soorlu utoqqalinersiutinut soraarnerussutisiassallu tapiinut tunngasutigut.

### **SIK-p aaqqissuussaanera**

#### **§ 4.**

SIK-p aaqqissuussaanera imaappoq:

1. Ataatsimeersuarneq.
2. Nakkutilliisoqarfik.
3. Siulersuisuunerit.
4. Ulluinnarni aqutsisut.
5. Peqatigiiffiit.
6. Illoqarfinni nunaqarfinnilu peqatigiiffeqanngitsuni attaveqaatit.
7. SIK-p Inuusuttai.

## Ataatsimeersuarneq

### § 5.

Ataatsimeersuarneq SIK-p oqartussaanerpaartaraa.

*Imm. 2.* Ukiut sisamakkaarlugit ataatsimeersuartoqartassaaq. Ataatsimeersuarneq septembarimi oktobarimiluunniit pisassaaq, siulersuisuunerillu ataatsimeersuariaqqusisassapput sivikinnerpaamik qaammatinik 5-inik sioqqutsillutik peqatigiiffinnut aamma SIK-p Inuusuttaanut allagaqarnermikkut imaluunniit emailimik nassiussinermikkut, kiisalu SIK-p nittartagaatigut nalunaaruteqarnermikkut.

### § 6.

Uku ataatsimeersuarnermi peqataassapput:

- Aallartitat peqatigiiffiit § 7 naapertorlugu toqqagaat. Aallartitat taakku oqaaseqarsinnaatitaallutillu taasisinnaatitaapput.
- Aallartitat marluk SIK-p Inuusuttaanit. Aallartitat taakku oqaaseqarsinnaatitaallutillu taasisinnaatitaapput.
- Siulersuisuunernut ilaasortat aallartitatut peqatigiiffinnit toqqagaanngitsut. Ilaasortat taakku oqaaseqarsinnaatitaallutillu taasisinnaatitaapput.

*Imm. 2.* SIK-mut ilaasortat kisimik ataatsimeersuarnermi peqataasussatut toqqarneqarsinnaapput.

### § 7.

Aallartitat ataatsimeersuarnermi peqatigiiffinnit peqataasussat amerlassusiat aalajangerneqassaaq SIK-p naatsorsuutai kukkunersiukkat kingulliit naapertorlugit agguaqatigiissitsinikkut ilaasortat amerlassusiat naapertorlugu. Taava amerlassusiliineqassaaq ima:

- |                                      |               |
|--------------------------------------|---------------|
| - Ilaasortat 35-nit 250-inut:        | Aallartitaq 1 |
| - Ilaasortat 251-init 500-nut:       | Aallartitat 2 |
| - Ilaasortat 501-init 750-inut:      | Aallartitat 3 |
| - Ilaasortat 751-it amerlanerusullu: | Aallartitat 4 |

*Imm. 2.* Peqatigiiffiit aamma SIK-p Inuusuttai ataatsimeersuarnissaq kingusinnerpaamik qaammatinik 3-nik sioqqullugu SIK-p allattoqarfianut nalunaaruteqassapput kikkut aallartitatut toqqarneqarsimanerannik.

## § 8.

Ataatsimeersuarnermi aalajangiinerit amerlanerussuteqarnikkut pisassapput malittarisassani allamik allassimasoqangikkaangat. Siulersuisuunernut ilaasortassanik qinersinerni taasinernik naligiit-toqartillugu pisariaqarnera naapertorlugu makitsinikkut aalajangiisoqartassaaq.

Pisinnaatitsissuteqarnikkut imaluunniit allakkatigut taasisoqarsinnaanngilaq.

*Imm. 2.* Ataatsimeersuarnermi taasinerit aallartitat aqqinik suaaruteqarnikkut imaluunniit nappaanikkut pisassapput, ataatsimeersuarnermik aqutsisuusup qanoq aalajangernera apeqqutaaluni. Inunnik qinersinerit allalluni taasinikkut pisassapput qinerneqartussanit amerlanerusunik qinigassanngortitsisoqaraangat.

## § 9.

Ullormut oqaluuserisassat minnerpaamik imaattunik immikkoortoqassapput:

1. Siulittaasup ammaanera.
2. Aqutsisussamik toqqaaneq.
3. Imaqarniliortussamik taasinernillu kisitsisussanik toqqaaneq.
4. Ullormut oqaluuserisassat akuerineqarnerat.
5. Siulersuisuunerit nalunaarutaat.
6. Naatsorsuutininik ilisimatitsissutitut saqqummiussineq.
7. Siunnersuutit tiguneqarsimasut oqaluuserineqarneri.
8. Ukiuni tulliuttuni marlunni ilaasortat kattuffimmut akiliutissaasa aalajangerneqarnerat.
9. Siulersuisuunissanik qinersineq.
  - a. Siulittaasoq
  - b. Siulittaasup tullia
  - c. Ilaasortat 7
  - d. Sinniisussat 5
10. Kukkunersiuisumik akuerisaasumik toqqaaneq.
11. Taasariaqartut allat.

## § 10.

Peqatigiiffiit SIK-mut atasut ataatsimeersuarnermi oqaluuserineqartikkusutaminnik siunnersuuteqarsinnaapput. Siunnersuutit peqatigiiffiup siulersuisuini oqaluuserineqareersimassapput akuersisutiginerarlutillu.

*Imm. 2.* Siulersuisuunerit aamma SIK-p Inuusuttai taamattaaq siunnersuuteqarsinnaapput ataatsimeersuarnermi oqaluuserineqartikkusutaminnik. SIK-p Inuusuttaanit siunnersuutit SIK-p Inuusuttaasa siulersuisuinit oqaluuserineqarsimassapput akuerineqarsimassallutillu.

*Imm. 3.* Peqatigiiffiit aamma SIK-p Inuusuttaasa siunnersuutaat ataatsimeersuarnissaq kingusinnerpaamik qaammatinik 3-nik sioqqullugu SIK-p allattoqarfianit tiguneqarsimassapput.

*Imm. 4.* SIK-p siulittaasussaatur qinigassanngortitat SIK-p allattoqarfianut nalunaarutigineqassapput ataatsimeersuarnissaq kingusinnerpaamik qaammatinik 3-nik sioqqullugu.

#### **§ 11.**

SIK-p allattoqarfia ataatsimeersuarnissami atortussanik peqatigiiffinnut, SIK-p Inuusuttaanut siulersuisuunernut kiisalu aallartitassatut toqqakkanut nassiussissaaq ataatsimeersuarnissaq kingusinnerpaamik qaammammik 1-imik sioqqullugu. Atortussanut ilaapput ullormut oqaluuserisassanut siunnersuutit, siunnersuutit tiguneqarsimasut kiisalu naatsorsuutit.

*Imm. 2.* SIK-p allattoqarfiata tamatuma peqatigisaanik klubbit § 35-mi taaneqartut atortussanik imm. 1-imi taaneqartunik nassissavai, taamaalillutik taakku ataatsimeersuarnissaq pillugu ilisimati-taaniassammata.

#### **§ 12.**

Aallartitat ataatsimeersuarnermi peqataasut siulersuisuunernut qinerneqarsinnaapput.

#### **§ 13.**

Ataatsimeersuarnermit imaqarniliaq siulersuisuunernut, peqatigiiffinnut, attaveqaatinut § 35-mi taaneqartunut, SIK-p Inuusuttaanut kiisalu aallartitatur toqqakkanut SIK-p allattoqarfianit nassiuneqassaaq ataatsimeersuarnerup kingorna kingusinnerpaamik sapaatip-akunneri 3 qaangiutsinnagit.

#### **§ 14.**

SIK-p allattoqarfia ataatsimeersuarnermut atatillugu angalanernut, ullormusianut kiisalu nerisaqarnermut ineqarnermullu aningaasartuutissat pillugit ataatsimeersuarnissaq sioqqullugu aalajangii-sassaaq.

## **Immikkut ittumik ataatsimeersuarneq**

### **§ 15.**

Siulersuisuunernut ilaasortat 2/3-ii imaluunniit peqatigiiffiit 2/3-ii tamatuminnga piumasaqarpata immikkut ittumik ataatsimeersuortoqassaaq. Tamatuminnga piumasaqarnerup peqatigisaanik ullormut oqaluuserisassanik siunnersuuteqartoqassaaq.

*Imm. 2.* Immikkut ittumik ataatsimeersuarneq ingerlanneqassaaq tamatuminnga piumasaqaatip SIK-p allattoqarfianit tiguneqarneranit kingusinnerpaamik qaammatit 3 qaangiutsinnagit.

*Imm. 3.* Immikkut ittumik ataatsimeersuarneq ingerlanneqassaaq § 6, § 7, imm. 1, § 8 kiisalu §§ 11-14 naapertorlugit.

*Imm. 4.* Peqatigiiffiit aamma SIK-p Inuusuttaasa immikkut ittumik ataatsimeersuarnissaq kingusinnerpaamik qaammatinik marlunnik sioqqullugu SIK-p allattoqarfianut nalunaarutigissavaat kikkut immikkut ittumik ataatsimeersuarnissamut aallartitatut toqqarsimanerlugit.

*Imm. 5.* Siulersuisuunerit aalajangersinnaapput immikkut ittumik ataatsimeersuarneq telefonikkut imaluunniit allakkatigut ingerlanneqassasoq.

## **Nakkutilliisoqarfik**

### **§ 16.**

Ataatsimeersuarnerit marluk akornanni Nakkutilliisoqarfik ataasiarluni ataatsimiittassaaq. Ataatsimiinnermi tassani makku sammineqarsinnaapput:

- Ataatsimeersuarnerit akornanni SIK-p ingerlatsinera aalajangiiffigissallugu.
- Isumaqatigiinniarnissani piumasaqaatissanik saqqummiussissalluni.
- Siulersuisuunerit ataatsimeersuarnermi nakkutilliisoqarfimmilu aalajangikkat naapertorlugit sulinerat nakkutigissallugu.
- SIK suliffeqarnerlu pillugit taasassat assigiinngitsut oqallisigissallugit.
- Ukiuni tulliuttuni marlunni ilaasortat kattuffimmut akiliutissaat aalajangiiffigissallugit.

### **§ 17.**

Nakkutilliisoqarfik ukuninnga inuttaqarpoq:

- Peqatigiiffiit SIK-mut atasut tamarmik 1-imik aallartitaqassapput peqatigiiffiit siulersuisuisa toqqagaannik. Aallartitatut toqqakkat taakku oqaaseqarsinnaatitaallutillu taasisinnaatitaapput.

- SIK-p Inuusuttaanit sinniisutut toqqagaq 1. Toqqagaq taanna oqaaseqarsinnaatitaallunilu taasisinnaatitaavoq.
- Siulersuisuunernut ilaasortat peqatigiiffinnit aallartitatut toqqagaanngitsut. Ilaasortat taaku oqaaseqarsinnaatitaallutillu taasisinnaatitaapput.

*Imm. 2.* SIK-mut ilaasortat kisimik nakkutilliisoqarfimmi aallartitatut toqqarneqarsinnaapput.

*Imm. 3.* Nakkutilliisoqarfik siulersuisuunernit ataatsimiigiaqquneqartassaaq sivikinnerpaamik qaammatinik 5-inik sioqqutsisumik, peqatigiiffinnut aamma SIK-p Inuusuttaanut allakkatigut imaluunniit e-mailikkut, SIK-llu nittartagaatigut nalunaaruteqartumik.

*Imm. 4.* Peqatigiiffiit aamma SIK-p Inuusuttaasa ataatsimiinnissaq kingusinnerpaamik qaammatinik pingasunik sioqqullugu SIK-p allattoqarfianut nalunaarutigissavaat kikkut aallartitat ataatsimiinneranni peqataatinniarnelugit.

## **§ 18.**

Peqatigiiffiit, siulersuisuunerit aamma SIK-p Inuusuttai nakkutilliisoqarfimmi oqaluuseritikkusutaminnik siunnersuuteqarsinnaapput. Peqatigiiffiit aamma SIK-p Inuusuttai oqaluuseritikkusutaminnik siunnersuutaat peqatigiiffiup aamma SIK-p Inuusuttaasa siulersuisuini oqaluuserineqaqqaarsimassapput akuersissutigineqarlutillu.

*Imm. 2.* Peqatigiiffiit aamma SIK-p Inuusuttaasa siunnersuutaat SIK-p allattoqarfianit tiguneqarsimassapput nakkutilliisoqarfiup ataatsimiinnissaa kingusinnerpaamik qaammatinik 3-nik sioqqullugu.

*Imm. 3.* SIK-p allattoqarfia nakkutilliisoqarfiup ataatsimiinnerani atortussanik peqatigiiffinnut, siulersuisuunernut aamma SIK-p Inuusuttaanut kiisalu ataatsimeeqataasussatut toqqakkanut nassiusissaaq ataatsimiinnissaq kingusinnerpaamik qaammammik 1-imik sioqqullugu. SIK-p allattoqarfia ta tamatuma peqatigisaanik attaveqaatit § 35-mi taaneqartut atortussanik taakkuninnga nassissavai ilisimatitsissutitut.

## **§ 19.**

Nakkutilliisoqarfiup ataatsimiinnerani aalajangiinerit amerlanerussuteqarnikkut pisassapput, malittarisassani allamik allassimasoqanngippat. Pisinnaatitsissuteqarnikkut imaluunniit allakkatigut taasisoqarsinnaanngilaq.

*Imm. 2.* Taasinerit taasisinnaatitaasut aqqinik suaaruteqarnikkut imaluunniit nappaanikkut pisassapput, ataatsimiinnermik aqutsisuusup qanoq aalajangiinera apeqqutaalluni, ataatsimiinnermi peqataasut ikinnerpaamik 2/3-ii allalluni taasisoqarnissaanik piumasaqanngippata.

## **§ 20.**

Ullormut oqaluuserisassat minnerpaamik imaattunik immikkoortoqassapput:

1. Siulittaasup ammaanera.
2. Aqutsisussamik toqqaaneq.
3. Imaqarniliortussamik taasinernillu kisitsisussanik toqqaaneq.
4. Ullormut oqaluuserisassat akuerineqarnerat.
5. Siulersuisuunerit nalunaarutaat.
6. Naatsorsuutinik ilisimatitsissutitut saqqummiussineq.
7. Siunnersuutit tiguneqarsimasut oqaluuserineqarneri.
8. Ilaasortat akiliutissaasa ukiunut tulliuuttunut marlunnut aalajangerneqarnerat.
9. Taasariaqartut allat.

## § 21.

Nakkutilliisoqarfiup ataatsimiinneranit imaqarniliaq peqatigiiffinnut, attaveqaatinut § 35-mi taaneqartunut, SIK-p Inuusuttaanut, siulersuisuunernut kiisalu Nakkutilliisoqarfiup ataatsimiinnerani peqataasunut SIK-p allattoqarfianit nassiunneqassaaq ataatsimiinnerup kingorna kingusinnerpaa-mik sapaatip-akunneri 3 qaangiutsinnagit.

## § 22.

SIK-p allattoqarfia nakkutilliisoqarfiup ataatsimiinneranut atatillugu angalanernut, ullormusianut kiisalu nerisaqarnermut ineqarnermullu aningaasartuutissat pillugit aalajangiisassaaq ataatsimiin-nissaq sioqqullugu.

## Siulersuisuunerit

## § 23.

Kattuffiup siulersuisuuneri ataatsimeersuarnerit nakkutilliisoqarfiullu ataatsimiinnerisa akornanni kattuffiup aqunneqarneranik isumaginnittuupput ataatsimeersuarnerni nakkutilliisoqarfimmilu aalajangikkat, tamatumani aamma inatsisit ataatsimeersuarnermi isumaqatigiissutaasut, naapertorlugit.

*Imm. 2.* Siulersuisuunerit inuttaqarput siulittaasumik, siulittaasup tullianik aamma siulersuisuunernut ilaasortanik arfineq-marlunnik, ataatsimeersuarnermi ukiunut sisamanut qinigaasunik. Siulersuisuunernut ilaasortat tamarmik oqaaseqarsinnaatitaallutillu, siunnersuuteqarsinnaatitaallutillu taasisinnaatitaapput. Aamma SIK-p Inuusuttaasa siulittaasuat, imaluunniit SIK-p Inuusuttaasa sinniisorisaat alla, siulersuisuunerit ataatsimiinnerini peqataasinnaatitaavoq oqaaseqarsinnaatitaalluni siunnersuuteqarsinnaatitaallunilu.

## § 24.

Siulersuisuunerit suleriaasissaminnik namminneq aalajangersaassapput, soorlu qanoq aalajangiisoqartassanerani, ullormut oqaluuserisassat sunik imaqarnissaannik, ataatsimiigiqqusinerni peri-aasissamik kiisalu siulersuisuunernut ilaasortanut akisussaaffinnik isumagisassanillu tunniussisoqarsinnaanerani, tamatuma-ni aamma aalajangigassat nukinginnartut qanoq suliarineqartarnissaat pillugu.

*Imm. 2.* Siulersuisuunerit ukiumut sisamariarlutik naapillutik ataatsimiittassapput. Tamakkua saniatigut telefonikkut imaluunniit allakkatigut ataatsimiittoqarsinnaavoq.

*Imm. 3.* Siulersuisuunerit kattuffiup missingersuusiortarnerinut akisussaapput, missingersuutit akuersissutigineqartassallutik ukioq missingersuuteqarfiusoq tulliuuttoq nallertinnagu siulersuisuunerit ataatsimiinneranni kingullermi.

*Imm. 4.* Siulersuisuunerit ataatsimiinnerinit imaqarniliat siulersuisuunernut ilaasortanut, § 16-imi aallartitatut toqqakkanut, peqatigiiffinnut, attaveqaatinut § 35-mi taaneqartunut kiisalu SIK-p Inuusuttaanut SIK-p allattoqarfianit nassiunneqartassapput ataatsimiinnerup kingorna kingusinnerpaamik sapaatip-akunneri 3 qaangiutsinnagit. Tamatuma saniatigut siulersuisuunerit pisussaaitapput sulinertik pillugu peqatigiiffinnut, attaveqaatinut § 35-mi taaneqartunut kiisalu SIK-p Inuusuttaanut pisariaqartutigut ilisimatitsisarnissaminnut.

## § 25.

Siulersuisuunernut ilaasortaq kommunalbestyrelsimut imaluunniit Inatsisartunut ilaasortatut qinigaaguni siulersuisuunernut ilaasortaaginnarsinnaavoq. Kisianni siulersuisuunernut ilaasortaq Naalakkersuisunut ilaasortatut toqqarneqaruni imaluunniit borgmesteritut qinigaaguni siulersuunernut ilaasortaaginnarsinnaanngilaq, ilaasortaajunnaartutullu naatsorsuunneqassaaq inissisimaffinni taaneqartuni sulilernini killigalugu.

*Imm. 2.* Siulersuisuunernut ilaasortaq politikikkut suliaqarnini pissutigalugu allamilluunniit pissuteqarluni siulersuisuunernut ilaasortatut suliassaminik isumaginnissinnaajunnaartutut naliliiguni, taanna siulersuisuunernut ilaasortaajunnaarluni aalajangersinnaavoq.

*Imm. 3.* Siulersuisuunernut ilaasortaq politikikkut suliaqarnini pissutigalugu allamilluunniit pissuteqarluni siulersuisuunerit ataatsimiinnerinut sivisuumik peqataasinnaajunnaartutut naliliippat, taanna siulersuisuunernut ilaasortatut sulinggiffeqartinneqassaaq.

*Imm. 4.* Siulersuisuunernut ilaasortaq kattuffiup aningaasaataanik atonerluisimasoq tunuartinneqarsinnaavoq siulersuisuunernut ilaasortaajunnaarsillugu. Aningaasanik atonerluisimaneq tunuartsinissaq pitinnagu kattuffiup kukkunersuisuanit uppersarneqassaaq. Aammattaq tunuartsisoqarsinnaavoq siulersuisuunernut ilaasortaq paasissutissanik allagaatinilluunniit kattuffimmut ajoqutaasumik atorneqarsinnaasunik siulersuisuunernit akuerineqarnani ingerlatitseqqiisimappat.

*Imm. 5.* Imm. 1-4 naapertorlugit ilaasortaajunnaarnermi, sulingiffeqartitaanermi imaluunniit tunuartitaanermi siulersuisuunerni sinniisussaq qinersinermi § 9 nr. 9-mi taaneqartumi taaneqarnerpaasimasoq ilaasortanngussaaq. Sinniisussat arlallit amerlaqatigiinnik taaneqarsimappata, imaluunniit sinniisussat taasinertaqanngitsumik qinigaasimappata, kina siulersuisuunernut ilaasortanngussanersoq makitsissutigineqassaaq.

*Imm. 6.* Siulittaasoq politikikkut suliaqarnini pissutigalugu allamilluunniit pissuteqarluni piffissap qinersiviusup ingerlanerani ikerinnakkut tunuarusuleruni, siulittaasutullu suliaaminik isumaginnissinnaajunnaartutut naliliiguni, siulittaasuunermi tunuarsinnaavoq.

Siulersuisuunerit taamatut pisoqarnerani aalajangersinnaapput § 15 naapertorlugu immikkut ittumik ataatsimeersuariaqqusisoqassasoq siulittaasussamik nutaamik piaarnerpaamik qinersinissaq siunertaralugu.

*Imm. 7.* Siulittaasoq siulittaasutut suliaaminik sivirusumik isumaginnissinnaanngippat taanna sulingiffeqartinneqassaaq, siulittaasullu tullia siulittaasup suliaasaanik isumaginnilerallassaaq. Siulittaasup uternissaanik siulittaasutullu suliaaminik isumaginneqqilernissaanik ilimanartoqanngippat siulersuisuunerit aalajangersinnaapput siulittaasup tullia siulittaasunngussasoq ileqqusumik ataatsimeersuarnissami tulliuuttumi siulittaasumik nutaamik qinersisoqarnissaata tungaanut, tamatumalu peqatigisaanik siulittaasup tullianik qinersisoqarluni aammalu sinniisussamik siulersuisuunernut ilaasortanngortoqarluni. Taamattaaq siulersuisuunerit aalajangersinnaapput § 15 naapertorlugu immikkut ittumik ataatsimeersuariaqqusisoqassasoq piaarnerpaamik siulittaasussamik nutaamik qinersinissaq siunertaralugu.

*Imm. 8.* Siulittaasoq kattuffiup aningaasaataanik atornerluisimappat siulersuisuunerit ataatsimeersuarnermi inassuteqarsinnaapput taanna tunuartinneqassasoq siulersuisuunernut ilaajunnaarsillugu. Aningaasanik atornerluisimaneq tunuartinneqassasoq pitinnagu kattuffiup kukkunersuisuanit uppernarsarneqassaaq. Siulersuisuunerit aammattaaq ataatsimeersuarnermi inassuteqarsinnaapput siulittaasoq tunuartinneqassasoq paasissutissanik allagaatinilluunniit kattuffimmut ajoqutaasumik atornerqarsinnaasunik aamma siulersuisuunernit akuerineqarnani ingerlatitseqqiisimappat.

*Imm. 9.* Ataatsimeersuarnermi aalajangerneqarpat siulittaasoq tunuartinneqassasoq, siulittaasup tullia siulittaasunngussaaq ileqqusumik ataatsimeersuarnissami tulliuuttumi siulittaasumik nutaamik qinersinissap tungaanut, ataatsimeersuartut siulittaasumik tunuartinneqarlutik aalajangernerminnut malitsigitiinnarlugu siulittaasussamik nutaamik qinersiniallutik aalajanginngippata.

Siulittaasup tullia ileqqusumik ataatsimeersuarnissap tulliuuttup tungaanut siulittaasunngorpat siulersuisuunerit siulersuisuunernut ilaasortat ilaannik siulittaasup tullianik nutaamik qinersissapput. Tamatuma peqatigisaanik siulersuisuunerni sinniisussaq qinersinermi § 9-mi nr. 9-mi taaneqartumi taaneqarnerpaasimasoq siulersuisuunernut ilaasortanngussaaq. Sinniisussat arlallit amerlaqatigiinnik taaneqarsimappata, imaluunniit sinniisussat taasinertaqanngitsumik qinigaasimappata, siulersuisuunernut ilaasortanngortussaq makitsissutigineqassaaq.

*Imm. 10.* Imm. 6-imi aamma imm. 7-imi taaneqartunik pissuteqartumik siulittaasup tullia ikerinnakkut tunuarpat tunuartinneqarpalluunniit siulersuisuunerit siulersuisuunernut ilaasortamik si-

ulittaasup tullianik nutaamik qinersissapput. Tamatuma peqatigisaanik siulersuisuunerni sinniisus-  
saq qinersinermi § 9-mi nr. 9-mi taaneqartumi taaneqarnerpaasimasoq siulersuisuunernut ilaasor-  
tannngussaaq. Sinniisussat arlallit amerlaqatigiinnik taaneqarsimappata, imaluunniit sinniisussat  
taasinertaqanngitsumik qinigaasimappata, siulersuisuunernut ilaasortanngortussaq makitsissutigineqassaaq.

*Imm. 11.* Siulittaasup tullia siulittaasup tulliatut suliassaminik sivisuumik isumaginnissinnaangip-  
pat taanna sulinngiffeqartinneqassaaq, tamannali kisiat pissutigalugu siulittaasumut tullugallat-  
tussamik qinersisoqartariaqarani. Siulittaasup tullia uternissaanik siulittaasullu tulliatut suliassa-  
minik isumaginneqqilernissaanik ilimanartoqanngippat siulersuisuunerit siulittaasup tullianik nu-  
taamik toqqaasinnaapput. Tamatuma peqatigisaanik siulersuisuunerni sinniisussaq qinersinermi §  
9-mi taaneqartumi taaneqarnerpaasimasoq siulersuisuunernut ilaasortanngussaaq. Sinniisussat  
arlallit amerlaqatigiinnit taaneqarsimappata, imaluunniit sinniisussat taasinertaqanngitsumik qi-  
nerneqarsimappata, siulersuisuunernut ilaasortanngortussaq makitsissutigineqassaaq.

*Imm. 12.* Siulittaasumik, siulittaasup tullianik imaluunniit siulersuisunut ilaasortamik tunuartitsinia-  
rneq aalajangiiffigineqartinneqassaaq inuk pineqartoq periarfissaqartinneqassaaq tunuartinniarnear-  
nerminut oqaaseqarfiginninnissaminut.

*Imm. 13.* Imm. 1-11 naapertorlugit aalajangiinerit piaarnerpaamik ilisimatitsissutigineqassapput  
peqatigiiffinnut, attaveqaatinut § 35-mi taaneqartunut kiisalu SIK-p Inuusuttaanut.

## **Ulluinnarni aqutsisut allaffissornikkullu pisortaq**

### **§ 26.**

Kattuffiup ulluinnarni aqutsisui kattuffiup siulittaasuanik siulittaasuatalu tullianik inuttaqarput,  
taakku tamarmik Nuummi najugaqassallutik.

*Imm. 2.* Ulluinnarni aqutsisut suleriaasissartik namminneq aalajangersassavaat, soorlu akisussaaf-  
fimmik suliassanillu qanoq agguaanissaq pillugit.

*Imm. 3.* Siulittaasup aamma siulittaasup tullia akissarsiaat siulersuisuunernit aalajangersarneqas-  
sapput. Nuummut Nuummillu nuunnerni aningaasartuutaasinnaasut taamattaq kattuffimmit aki-  
lerneqassapput. Pisariaqartitaq naapertorlugu inissaqartitsineqassaaq malittarisassat atuuttut ma-  
lillugit ineqarnermut akiliisoqartassalluni.

*Imm. 4.* SIK-p allattoqarfiani allaffissornikkut pisortamik atorfinitsitsinermut soraarsitsinermullu  
tunngasutigut aalajangigassat pisariaqartut ulluinnarni aqutsisut inassuteqarneratigut siulersuisu-  
nerit aalajangiiffigissavaat.

*Imm. 5.* SIK-p allattoqarfiani allaffissornikkut pisortaq allattoqarfimmi allaffissornikkut sulisussanik  
pisariaqartunik atorfinitsitsillunilu soraarsitsisassaaq.

## Peqatigiiffiit

### § 27.

Illoqarfinni nunaqarfinnilu SIK-mut ilaasortat 35-uppata amerlaneruppataluunniit peqatigiiffimmik SIK-mut atasumik pilersitsisoqarsinnaavoq.

*Imm. 2.* Peqatigiiffittut ilanngunniarluni qinnuteqaat siulersuisuunernut allaganngorlugu nassiunneqassaaq. Siulersuisuunerit qinnuteqaat itigartippassuk qinnuteqartut aalajangerneq naammagittaalliuutigisinnaavaat ataatsimeersuarnissamut tulliuttumut.

### § 28.

Peqatigiiffik SIK-mut atasutut akuersissutigineqarpat tamatuma kingorna qaammatit 3 qaangiut sinnagit pilersitsiviusumik ataatsimeersuarneqassaaq, tassani peqatigiiffiup malittarisassai akuersissutigineqassallutik siulersuisunillu qinersisoqassalluni.

*Imm. 2.* Malittarisassat akuersissutigineqartut aamma ataatsimeersuarnermit pilersitsiviusumit imaqarniliaq SIK-p allattoqarfianut nassiunneqassapput, ataatsimeersuarnerup pilersitsiviusup kingorna kingusinnerpaamik sapaatip-akunneri 3 qaangiut sinnagit.

### § 29.

Peqatigiiffimmi ileqquusumik ataatsimeersuortoqartassaaq siulersuisullu ataatsimiittassallutik peqatigiiffiup malittarisassai naapertorlugit. Ataatsimiinernit taakkunanga imaqarniliat SIK-p allattoqarfianut nassiunneqartassapput ataatsimiinnerit kingornatigut kingusinnerpaamik sapaatip-akunneri 3 qaangiut sinnagit.

*Imm. 2.* Peqatigiiffiup malittarisassai minnerpaamik imaqassapput peqatigiiffinnut malittarisassani nalinginnaasuni kattuffiup ataatsimeersuarnerani akuersissutigineqarsimasuni, SIK-p malittarisassaanut ilanngussatut ilanngunneqartuni, aalajangersakkanik allassimasunik. Peqatigiiffiit malittarisassaat nalinginnaasut nutaat ataatsimeersuarnermi akuersissutigineqassappata peqatigiiffiit tarmarmik ataatsimeersuarnissaminni tulliuttumi siullermi malittarisassatik pisariaqartutugut malittarisassanut nalinginnaasunut nutaanut naleqqussarlugit akuersissutigissavaat. Malittarisassat naleqqussakkat SIK-p allattoqarfianut nassiunneqassapput.

### § 30.

SIK-p inatsisai, tassa SIK-p malittarisassai peqatigiiffiullu nammineq malittarisassai, peqatigiiffiup malissavai. Taamattaq kattuffiup ataatsimeersuarnerani, nakkutilliisoqarfimmi siulersuisuunernilu aalajangiinerit peqatigiiffiup malitassarai.

*Imm. 2.* Peqatigiiffiit tamarmik pisussaapput SIK-mut ilaasortamik kiffartuussissallutik, taanna nunatsinni suminngaanneeraluarpalluunniit.

### **§ 31.**

Kattuffiup ataatsimeersuarnerani, imaluunniit ataatsimeersuarnerit akornanni Nakkutilliisoqarfiup ataatsimiinnerani, siulersuisuunerit inassuteqarneratigut 2/3-mik amerlanerussuteqarnikkut peqatigiiffik SIK-mut ilaajunnaarsinneqarsinnaavoq peqatigiiffiup SIK-p inatsisai unioqutissimapatigut.

*Imm. 2.* Siulersuisuunerit peqatigiiffimmut allagaqarlutik ilaajunnaarsitsinermik kattuffiup ataatsimeersuarnerani imaluunniit Nakkutilliisoqarfiup ataatsimiinnerani aalajangerneq nalunaarutigissa-vaat.

*Imm. 3.* Peqatigiiffimmik imm. 1 naapertorlugu ilaajunnaarsitsineq ilaasortaasunut ataasiakkaanut sunniuteqassanngilaq taakku akiliuteqartuaannarnermikkut SIK-mut ilaasortaaginnarsinnaam-mata. Peqatigiiffik SIK-mut ilaajunnaarsinneqarpat ilaasortat pineqartut peqatigiiffimmut SIK-mut atasumut qaninnermut attaveqalissapput.

*Imm. 4.* Uppernarsarneqarsinnaappat peqatigiiffimmi siulersuisunut ilaasortaq ataaseq arlallilluun-niit SIK-p inatsisaanik unioqutitsisimasut, soorlu ataatsimeersuarnermi, nakkutilliisoqarfimmi imaluunniit siulersuisuunerni aalajangikkat malissimanagit, kattuffiup ataatsimeersuarnerani siu-lersuisuunerit inassuteqarneratigut peqatigiiffimmi siulersuisunut ilaasortaq taanna imaluunniit siulersuisunut ilaasortat taakku peqatigiiffimmi siulersuisunut ilaasortatut tunuartinneqarnissaat kattuffiup ataatsimeersuarnerani imaluunniit ataatsimeersuarnerit akornanni Nakkutilliisoqarfiup ataatsimiinnerani 2/3-mik amerlanerussuteqarnikkut aalajangerneqarsinnaavoq. Taamaattoqartil-lugu peqatigiiffik peqatigiiffiup immikkut ittumik ataatsimeersuarnerani siulersuisunut ilaasortanik nutaanik qinersisoqassasoq siulersuisunut ilaasortat tunuartinneqartut amerlaqataannik.

*Imm. 5.* Imm. 1 aamma 4 naapertorlugit aalajangiisoqartinnagu peqatigiiffik pineqartoq imaluun-niit siulersuisunut ilaasortaq pineqartoq suliamut tunngatillugu oqaaseqarsinnaatitaassapput.

### **§ 32.**

Ukiuni kingullerni marlunni immikkoortortaqarfiup naatsorsuutai kukkunerisukkat naapertorlugit ilaasortat agguaqatigiissitsinikkut amerlassusiat 35-t ataanniippat siulersuisuunerit peqatigiiffik na-lunaarfigissavaat peqatigiiffittut naatsorsuunneqarunnaartoq.

*Imm. 2.* Peqatigiiffiup naatsorsuutai kukkunerisukkat kingulliit naapertorlugit ilaasortat 35-nit ikin-nerulersimappata siulersuisuunerit pisussaataapput peqatigiiffik allakkatigut ilisimatissallugu 35-t inorlugit ilaasortaqaalersimasoq, taamaattumillu peqatigiiffik atorunnaarsinneqarsinnaasoq taman-na naatsorsuutini kukkunerisukkani tulluuttuni atuuteqqissagaluarpas.

*Imm. 3.* Peqatigiiffik imm. 1 naapertorlugu atorunnaarsinneqarpat siulersuisuunerit isummerfigis-savaat aningaasat peqatigiiffiup atorunnaarsinnerani pigineqartut qanoq pineqassanersut.

### **§ 33.**

SIK-p allattoqarfia pisussaaitaavoq peqatigiiffinnut qaammatikkaartumik nalunaaruteqassalluni taakkua aningaasatigut qanoq inissisimaneri pillugit.

*Imm. 2.* Peqatigiiffik aningaasatigut annertuumik ajornartorsiortoq paasineqarpat SIK-p allattoqarfia ajornartorsiutit iluarsineqarnissaannut tigussaasumik ikiutissalluni pisussaaitaavoq. Taamattaq SIK-p allattoqarfia pisussaaitaavoq peqatigiiffiup ingerlanera pillugu siulersuisuunernut ilisimatitsissalluni, taamaalillutik siulersuisuunerit aningaasaqarnikkut pissutsinut akuliussinnaaniasammata ajornartorsiutit iluarsineqarnissaasa tungaannut, soorlu peqatigiiffimmut pituttuisunik aalajangiussaqaarlutik.

*Imm. 3.* Peqatigiiffiup aningaasaataasa atornerlunneqarnerannik SIK-p allattoqarfia pasitsaassaqaaruni imaluunniit ilisimasaqalersimaguni pisussaaitaavoq tamanna siulersuisuunernut nalunaarutigissallugu, taamaalillutik siulersuisuunerit aningaasaqarnikkut pissutsinut akuliussinnaaniasammata, soorlu peqatigiiffimmut pituttuisunik aalajangiussaqaarlutik.

*Imm. 4.* Tamatuma saniatigut peqatigiiffik ajornartorsiutigisami aaqqinniarnernanni tapersorsorneqarnissamik kissaateqarpat imaluunniit peqatigiiffiit arlallit akornanni ajornartorsiuteqarpat SIK-p allattoqarfia ikiunnissamut pisussaaitaavoq. Taamattaq suliffimmi inunnut aalajangersimasunut tunngasunik SIK-mut ilaasortat akuuffigisaannik suliassaqaartillugu SIK-p allattoqarfia peqatigiiffimmut imaluunniit sulisut sinniisaannut peqatigiiffimmut atassuteqartunut sullissinissaminut aamma siunnersuinissaminut pisussaaitaavoq.

### **§ 34.**

Peqatigiiffiup akisussaaffigaa suliffinni sulisut sinniisaannik qinersisoqartarnissaa malittarisassat atuuttut naapertorlugit, taamatullu aamma sulisut sinniisaat qinikkat pisariaqartumik oqaloqatigisarnissaat akisussaaffigalugu. Aammattaq nakkutigisarissavaa sulisut sinniisaasa suliassaat, pisinnaatitaaffii pisussaaffiilu pillugit sulisitsisunik isumaqatigiissutaasimasut suliffinni malinneqarnissaat.

*Imm. 2.* SIK-mut ilaasortaasunik sumiiffimmilu sulisitsisunik pisariaqartumik oqaloqatiginnittarnissaq peqatigiiffiit akisussaaffigaat.

## **Illoqarfinni nunaqarfinnilu peqatigiiffeqanngitsuni attaveqaatit**

### **§ 35.**

Illoqarfinni nunaqarfinniluunniit SIK-mut atasumik peqatigiiffeqanngitsuni attaveqaatinik SIK-mut ilaasortaasunik peqatigiiffik qaninneq toqqaasassaaq.

*Imm. 2.* Sumiiffimmi pineqartumi SIK-mut ilaasortat, peqatigiiffiup qaninnerup kiisalu SIK-p allattoqarfiata pisariaqartumik attavigineqarnerat attaveqaatip isumagisassaraa.

*Imm. 3.* Siulersuisuunerit aalajangersinnaapput attaveqaatit toqqakkat akissaateqassanersut imaluunniit sulinermit akissarsiassaraluaminnik annaasaqarnerminnut matussusiivigineqassanersut. Taamatut akissaateqartitsineq imaluunniit sulinermit akissarsiassaraluanik annaasaqarnermut matussusiineq peqatigiiffiup qaninnerup aningaasalersussavaa.

## **SIK-p Inuusuttai**

### **§ 36.**

SIK-p Inuusuttai tassa nuna tamakkerlugu inuusuttut peqatigiiffiat sulisartunut inuusuttunut ilinniagaqartunullu SIK-mut ilaasortaasunut sammisitaq.

*Imm. 2.* SIK-p Inuusuttai namminneq malittarisassaaqarput kattuffiup malittarisassaanut naleqqusakkanik siulersuisuunernillu akuerisaasunik.

*Imm. 3.* SIK-p Inuusuttai ukiumoortumik missingersuusiortassapput siulersuisuunernut akuerisasannngortitanik.

*Imm. 4.* SIK-p Inuusuttaasa siulersuisuisa ataatsimiinnerisa aaqjissuussinerisalu piareersarneqarnerinut ingerlanneqarnerinullu ikiuutissalluni SIK-p allattoqarfia pisussaavoq. Tamatuma saniatigut SIK-p allattoqarfia missingersuutinut siunnersuusiordermi il.il. ikiuuttassaaq.

## **Isumaqatigiinniartarnerit**

### **§ 37.**

Isumaqatigiinniarnissat tulluuttut pillugit ataatsimeersuarnermi nakkutilliisoqarfimmilu aalajangiisoqarsinnaavoq. Tamatuma saniatigut isumaqatigiinniarnarit sioqqulluarlugit siulersuisuunerit

peqatigiiffinnut SIK-mut atasunut aamma sulisut sinniisaannut siunnersuutaasinnaasunik tusarni-aasinnaapput. Peqatigiiffiit sulisullu sinniisaasa siunnersuutaat tigusatik siulersuisuunerit oqallisi-galugillu pingaarnersiorlugit tullerriaassavaat.

*Imm. 2.* Ulluinnarni aqutsisut isumaqatigiinniarnissat piareersarlugillu ingerlatsissavaat, soorlu imm. 1-imi taaneqartutut aalajangiinerit tullerriaarinerillu aallaavigalugit. Sulisut sinniisaat pisariaqartit-sineq naapertorlugu peqataasinnaapput isumaqatigiinniarnit piareersarneqarneranni ingerlan-neqarnerannilu.

*Imm. 3.* Ulluinnarni aqutsisut sulisitsisullu isumaqatigiinniarnerminni angusaat atortussanngortin-neqartinnagit siulersuisuunernit akuersissutigineqaqqaarallassapput.

*Imm. 4.* Ulluinnarni aqutsisut sumiiffimmi suliffeqarfimmik isumaqatiginninniaraangata sumiiffim-mi peqatigiiffik peqatiserineqartassaaq.

*Imm. 5.* Ulluinnarni aqutsisut sumiiffinni suliffeqarfinnut isumaqatigiinniarnernik piareersaaneq ingerlatsinerlu peqatigiiffimmut SIK-mut atasumut pisinnaatitsissutigalugu isumagisassanngortis-sinnaavaat. Taamaattoqartillugu isumaqatigiinniarnerni piumasaaqatissat allannguutissanillu siun-nersuutit ulluinnarni aqutsisunut akuerisassanngortinneqaqqaarallassapput illua'tungiliuttunut saqqummiunneqartinnagit.

Sumiiffimmi isumaqatigiinniarnerni isumaqatigiittoqarsinnaatinnagu ulluinnarni aqutsisut isuma-qatiginninniarnissamut pisinnaatitsissut tigoqqissavaat.

*Imm. 6.* Isumaqatigiinniarnernut atasumik sulinermik unitsitsinerit suliumajunnaarnerillu siuler-suisuunerit akuersissuteqarnerisigut aatsaat pisinnaapput, taakku aamma SIK-p suliumajunnaar-nissamut aningaasaateqarfiata suliumajunnaartunut ikiorsiisinnanera pillugu aalajangiisussaam-mata.

## **Aningaasaqarneq**

### **§ 38.**

Peqatigiiffiit SIK-mut atasut tamarmik ilaasortamik akiliutissaat peqatigiiffimmi suliniutinut ator-tussat aalajangersartassavaat. Kattuffiup ataatsimeersuarnerani nakkutilliisoqarfiullu ataatsimi-innerani akiliutit kattuffimmi suliniutinut atorneqartussat peqatigiiffinni suliniutinut attuumassute-qanngitsut aalajangersarneqartassapput.

*Imm. 2.* Ilaasortat illoqarfinni nunaqarfinnilu SIK-mut atasunik peqatigiiffeqanngitsuni najugaqartut akiliutissaat peqatigiiffimmit qaninnermit aalajangersarneqartassapput, akiliutit tamarmiusut ilaat sumiiffinni suliniutinut atorneqartussat eqqarsaatigalugit. Ilaasortaanermut akiliutit ilaat taakku peqatigiiffiup qaninnerup pissarai, akiliutillu sinneri kattuffiup pissaralugit suliniutinut sumiiffinni suliniutinut attuumassuteqanngitsunut matussutissaallutik.

*Imm. 3.* Ilaasortaanermut akiliutip aalajangersarneqarneranut atatillugu aalajangerneqarsinnaavoq ilaasortat ilaat minnerusumik akiliuteqartinneqassasut uku:

- a. Piffissap ilaannaani sulisartut
- b. Ilinniagaqartut
- c. Suliffissaarusimasut sivisuumillu napparsimasut
- d. Soraarnerussutisiallit

*Imm. 4.* Ilaasortaanermut akiliut PBS-ikkut akilerneqartassaaq. Sulisitsisulli sulisullu isumaqatigiisutiginnaavaat akissarsianik ilanngaanikkut ilaasortaanermut akiliutit akilerneqartassasut.

### **§ 39.**

Siulersuisuunerit isumagisassaraat SIK-p siunertanut assigiinngitsunut aningaasanik sillimmateqar-nissaa, tamatumunnga ilaalluni ilaasortat akiliutaasa ilaasa suliumajunnaarnissamut aningaasaate-qarfimmut toqqorterneqarnissaat.

### **§ 40.**

SIK-p naatsorsuutai, aamma peqatigiiffiit naatsorsuutaat, kukkunerisuisumit ataatsimeersuarnermi toqqarneqartumit kukkunerisiorneqassapput.

*Imm. 2.* Kattuffiup naatsorsuutai siulersuisuunernit akuersissutigineqassapput, tamatumalu kingor-na ataatsimeersuarnermi ilisimatitsissutitut saqqummiunneqassallutik. Peqatigiiffiit naatsorsuu-taat peqatigiiffinni siulersuisunit susassaqtunit akuersissutigineqassapput.

### **§ 41.**

Peqatigiiffiit SIK-p allattoqarfianit naatsorsuuserissunneqassapput, SIK-llu allattoqarfia peqatigiiffiit netbankimi kontuinut pisinnaatinneqassaaq. Qaammatit tamaasa SIK-p allattoqarfia naatsorsuutit anillatsinneqarnerinik peqatigiiffinnut nassiussisassaaq.

### **§ 42.**

Peqatigiiffiit SIK-mut atasut Ôdâq Olsenip Aningaasaateqarfianut ukiumoortumik aningaasaliisas-sapput. Aningaasat angissusissaat siulersuisuunerit aalajangertassavaat. Peqatigiiffiit siunnersuu-teqarnerisigut, siulersuisuunerillu aalajangiinerisigut, aningaasaateqarfimmit nersornaasiisoqartas-saaq.

*Imm. 2.* Ukiorpassuarni ilaasortaasimasut kajumissaatinik nersornaaserneqarsinnaapput nunani tamalaani sulisartut ulluanni tunniunneqartunik. Tamanna peqatigiiffiit siunnersuuteqareernergigit pisassaaq, taavalu kikkut nersornaatisitineqassanerannik siulersuisuunerit aalajangiissapput.

*Imm. 3.* Siulersuisuunerit ukiorpassuarni ilaasortaasimallutik suliunnaartunik ataqqinaammik ilaasortanngortitsisinnaapput. Siulersuisuunerit aalajangiisinnaapput ataqqinaammik ilaasortat uki-umoortumik aningaasassaqaartinneqartassasut SIK pillugu suliaqarsimanerannut qujaniutitut.

### **Atsiorsinnaanermut malittarisassat akisussaanerlu**

#### **§ 43.**

Siulittaasoq siulittaasup tullianik imaluunniit siulersuisunut ilaasortamik allamik peqateqarluni kattuffik sinnerlugu atsiorsinnaatitaavoq.

*Imm. 2.* Aalajangigaq sunaluunniit kr. 100.000-inik annerusumilluunniit nalilik iluanaarutissaappat aningaasartuutaassappalluunniit, missingersuutini siulersuisuunernit akuersissutigineqarsimasuni allassimangippat, isumaqatigiissutitut atsiorneqartinnagu siulersuisuunernut akuersissanngorlugu saqqummiunneqaqqaarallassaaq.

*Imm. 3.* Kattuffiup ilaasortai, aamma siulersuisuunernut ilaasortat, kattuffimmut akisussaaffigitineqartunik sunilluunniit namminneq akisussaaffeqanngillat.

### **Malittarisassanik allanngineq**

#### **§ 44.**

SIK-p malittarisassai taamaallaat kattuffiup ataatsimeersuarnerani aalajangernikkut allanngortineqarsinnaapput.

*Imm. 2.* Malittarisassat allannguutissaannik siunnersuutit SIK-p allattoqarfianut nassiunneqassapput piffissaliussat § 10 imm. 3-mi taaneqartut naapertorlugit.

*Imm. 3.* Malittarisassat allannguutaat ataatsimeersuarnermit aalajangiiffigineqartumit atuutilisapput.

## **Kattuffiup atorunnaarsinneqarnera**

### **§ 45.**

Kattuffik atorunnaarsinneqarsinnaavoq aatsaat 2/3-imik ataatsimeersuarnerni tulleriinni marlunni amerlanerussuteqarnikkut, ataatsimeersuarnerup aappaa ileqquusumik ataatsimeersuarnerussalluni. Amerlanerussuteqarnikkut aalajangerneqassaaq kattuffiup pigisai nalillit qanoq atorneqassanersut.

Ilanngussat: Peqatigiiffinni malittarisassat nalinginnaasut 25. oktobari 2017-imi kattuffiup ataatsimeersuarnerani akuersissutigineqartut.

*Ataatsimeersuarnermi akuersissutigineqartut ulloq 2. septembari 2021.*